

ko te "University of Life." Ka ui ano te pakeha ra kei hea tena University, no te whakamarauatanga a Timi, ka tuohu taua tangata ka miharo.

I a ia i Ranana ka whakauratia ia hei mema mo te "Savage Club" ara i takahia nga ture pumau o taua karapu i runga i te mina mai o taua ropu kia tae atu a Timi ki te korero kia ratou. Ko taua ture me whai mahi rawa te tangata ara me profession, business, katahi ano ka uru atu taua ropu. Ka rongu ia i taua ahuatanga i tae ai ia ki reira me te whakamiharo a taua ropu ki tona ahua me nga korero i whakaputa ina e ia katahi ia ka korero ki taua iwi, kaore ano he karapu pakeha kua tu noatu te karapu maori, a ko ia he mema no taua karapu. Ko te whakauru ki taua karapu me ngau te tangata ki te paepae hamuti katahi ano ka mana ki te whai ki i roto i taua whakaminenga.

Me hemea tenei tangata i tu hei roia ka tu ia hei Tiati. Mehemea ia i Merika ka tu hei perehitini. Kaore tahi he turanga e kore e taea e tenei tu o te whakawairakautanga o te hinengaro. Kaore tahi ra he tangata o ngai taua hei peneti te nui o te whakamiharo atu! Kaore i ngaro atu ki muri o Te Paranihi, o Atkinson, o Te Hetana, o Kapene Rata, o Te Waari, o Te Karimana, o Hall-Jones, o Te Pere, o Maahi, o Te Herihi, o Mauca, o MacKenzie, o Makitanara, o Allen.

"The renascent Kahungunu" Te Kauhoun-ariki o te hingaro. No Ngati Kahungunu ki Te Wairoa te kauhoun o tenei tangata. Nga kupu pakeha i runga ake nei no roto i te nupepa "Gisborne Times," kaati kei te marama noatu i a tatou nga whakaaro o taua pakeha na ana i tuhi ana korero, ara e peneti ana tona ki ko Timi Te Kahungunu tuarua i whanau mai ki te ao nei. E peneti ana hoki tona mahara koia tenei ko te mihi nui e rite ana ma ana mo tenei tangata nui, e tika ana hoki ki taku whakaaro kia peratia te korero mo Timi. Kaati mehemea a Timi i te rongu mai ki enei whakaritenga i a ia ki tona tupuna tera ia e tino hari tona ngakau.

Ko te whawharua tenei o ta tatou Timi e kiiia nei ko Te Timi a Te Katoa. Na nga kupu tata a nga iwi i whakaeke ki runga i a Timi mo te tomuri o etahi ka ta enei korero:—He aha i tata ai i etahi notemea he Timi ia na te katoa. Na Te Haenga Teparitipua te kupu "Kaore matou i haere mai ki te tangi ki to matou papa engari i haere mai matou ki te tangi ki te tangata a te katoa.

Ko te whakapapa nui ia o tenei tangata i rangatira ai ia i te aroaro o te ao "Ko te Kauhoun Ariki o te hinengaro" ara ko ta te pakeha e ki ra "The aristocracy of the mind" ahakoa kei hea, he aha ranei taua tangata, ko ia tenei ko te matapuna me te uunga atu o nga kawai whakapapa whakahirahira i te arikitanga o te tangata. Ka huri kaore etahi atu whakapapa i te mahana o tenei, na reira i tika ai kia nui, kia roa, kia u ki roto i o tatou hinengaro a tatou mihi, a tatou tangi ki to tatou kaumaua.